

REGIONAL NEWS

HEADLINES:-

1. Kumin thla 5 chhungin Mizoram Police-ten heroin kg. 38 leh gram 651 an man.
2. Run lei bomb chhiat avangin Teddim kaltlanga Tahan atanga Mizorama Myanmar sumdawng bungrua lakluh chu tihtawp rih a ni.
3. Zanin dar 7:15-a Narendra Modi-a kaihhruai sorkar laipui thar la lut turin ruahmanna peihfel a ni.
4. Sikkim Krantikari Morcha hruaitu, Prem Singh Tamang-a kaihhruai Sikkim sorkar thar, naktukah lak luh a ni dawn.

<><><>

POLICE DRUG SEIZURE

Kumin January thla atanga May thla tawp thlang khan Mizoram Police-ten heroin kg. 38 leh gram 651 an man.

IGP (Law and Order) Pu Lalbiakthanga Khiangte hnen atanga Akashvani Aizawl thu dawn danin thla 5 chhunga Police-te heroin man hi tualchhunga an hralh danin cheng vaibelchhe 11 leh nuai 59 chuang hu a ni a. Heroin tawlh man chhuah chungchangah hian Police-te chuan Mizoram hmun hrang hrangah thubuui 154 ziak lutin inhnawnawihah puh mi 209 an man tawh a ni. Police-te hian thla 5 chhung vek hian Methamphetamine kg. 89 leh gram 445 an man a, an Methamphetamine man hi cheng vaibelchhe 11 leh nuai 62 hu niin an chhut a. Methamphetamine bakah hian a muma siam ni ve lo Crystal Meth kg. 13 leh gram 49 an man bawh a. Crystal Meth hi a to hle niin an sawi a, an man hi cheng vaibelchhe 40 leh nuai 47 hu zet niin an sawi. Methamphetamine leh Crystal Meth kaihhnawihah hian thubuui 11 ziahluh a ni a, mi 17 man an ni.

Nikum, 2023 kha Mizorama Police-te'n heroin an man tam ber kum a la ni a, nikum chung khan heroin kg. 68 leh gram 55 an man a. A hun lai a tualchhunga heroin an hralhna rate-ah chuan cheng vaibelchhe 20 leh nuai 41 hu ni a chhut a ni. Nikum chung vek khan Methamphetamine kg. 154 leh gram 172 an man a, a hun lai rate angin cheng vaibelchhe 20 leh nuai 4 hu a ni a. Crystal Meth hi kg. 49 leh gram 5 an man a, hei hi a hun lai a tualchhunga an hralhna rate chu cheng vaibelchhe 147 leh nuai 1 hu a ni an ti. Nikum chung vek hian Methamphetamine siamna atana an hman Pseudoephedrine kg. 210 leh gram 72 zet man a ni bawh. Nikum chung khan heroin tawlh ruk kaihhnawihah thubuui 232 ziak lut in, mi 325 man an ni bawh a. Methamphetamine tawlh chungchangah thubuui 16 ziaklutin mi 25 man an ni a. Crystal Meth chungchangah thubuui 6 ziaklutin mi 9 man a ni bawh a ni.

Mizorama inbun dan kengkawhtu pawl (law enforcement agency) hrang hrangte chuan Methamphetamine hi Mizoramah hmang an la awm rih lo ni a an hriat thu leh Mizoram pawna thawn chhuah tura Myanmar atanga tawlhruk thin a nih thu an sawi a. India rama damdawi atana siam Pseudoephedrine hi Myanmar-ah to taka hralhin chu chu Methamphetamine siamna atan an lo hmang a, Mizoram kaltlangin an hralh leh thin niin an sawi a ni.

<><><>

ASF

Vawiinah African Swine Fever (ASF) vei vawk 7 a thih belh leh avangin Mizoram puma vawk pulhri leng vangin kuminah vawk 1,538 an thi tawh.

Animal Husbandry and Veterinary department hotute'n an sawi danin ASF vawk pulhri darh zel tur venna atan vawiin khan vawk 11 tihlum a ni bawh a. Kumina vawk pulhri darh tur venna atana vawk tihlum tawh zawng zawng hi 3,902 a tling tawh a ni. Vawiina vawk thite hi Aizawl district a Muthi khua a 5 leh Durtlang Leitan a 2 a ni a, Serchhip district-a Chhingchhip khuaah vawk 11 tihlum a ni.

Hriat theih chinah Khawzawl district-a Dulte khua-in African Swine Fever vawk pulhri avang hian kuminah vawk an chan tam tawh ber a, an khua-a vawk 167 aia tlem lo a thi

tawh a ni. Vawk pulhri darh zel tur venna atana vawk tihlum tamna ber chu Aizawl district-a Tuirial khua niin vawk 459 tihlum a ni tawh a ni.

<><><>

AIZAWL POST OFFICE

Aizawl Dak Inpui chu mipuiin an hmang tangkai hle a, nikhatah parcel 1,000 chuang thawn chhuah thin a ni.

Dak inpui hian dawrtu an ngah thin avangin thawktu indaihlo na a nasa hle a, Asst Post Master Pu KL Zohmingliana hnen atanga kan Corr thudawn danin Phai lam atanga bungraw lo kal chu National sorting hub-ah a lut khawm a, chuta tang chuan district dangah an thawn chhuak thin a. Parcel pakhatah kg 30 ai a rit bungrua a thawn theih loh thu Pu KL Zohmingliana chuan sawiin Speed post bik a thawnte chu thlawhna hmanga a thawn thin niin a bak Registered Parcel a bungraw thawn te chu Silchar atanga surface Mail a an thawn thin thu a sawi.

Asst. Post Master chuan thlawhna a bungrua an thawnah, alh thei thil, battery, zuk leh hmuam, Thil hriamte chu thawn khap a nih thu sawiin, thawn lui an lo awm thin thu leh mipuite pawh an bungraw thawnah fimkhur zuala heng an khap thilte chu thawn lo hram turin a ngen a, bungraw thawn te a him zawk theih nan uluk taka an bungrua te fun thin turin Mipuite an chah a, thil thawn duhte'n harsatna an nei a nih chuan Dak Inpui a kal kher lo in phone hmang pawha biakpawh theih reng an nih thu a sawi bawk.

<><><>

MYANMAR WARES IN CHAMPHAI

Run lei bomb chhiat avangin Teddim kaltlanga Tahan atanga Mizorama Myanmar sumdawng bungrua lakluh chu tihtawp rih a ni.

Mizoramin Myanmar atanga sumdawna bungraw chi hrang hrang leh ei leh in tur a lakluhna kawngpui ber, Teddim leh Zokhawthar inkara lei pawimawh tak, Run lui chungaw dawh chu bomb chhiat a nih avangin nimin atang khan Myanmar atangin Mizoram lam ah bungrua a rawn lut mumal thei lova. Tahan atanga Teddim kal tlanga Myanmar bungrua, Mizorama lo lut thin chu a tawp vek rih a ni.

Champhai a kan Corr Lalhlupui-a'n a sawi danin nimin, Inrinni zing karah khan Run lui kal kaina Lei, feet 20 vela zau leh Feet 300 vela thui, (Suspension bridge) chu Myanmar Sipai, State Administration Council mi leh sa ni a hriatte'n bomb hmangin an tichhia a. He lui hi lirthei leh kea kalte tan pawh kal kai theih a ni rih lova, hei vang hian Tahan atanga zawrh tur thil mipui nitin mamawh bungrua a rawn lut thei ta rih lo a ni. Hetihlai hian Tahan leh Falam inkara, Run Lei, Var lei an tih chu lirthei leh ke a kalte'n tluang takin an la zawh thei a, a kawng thui-in hla zawk pawh ni se, Falam atangin Mizoram a Zokhawthar lamah Myanmar bungrua hi rawn lut leh thei tura beisei a ni.

<><><>

REFUGEES

Myanmar leh Bangladesh atanga raltlan awm kawpna awm chhung Lawngtlai district-ah chuan raltlan 7,794 an awm mek a, theih ang anga chhawmdawl an ni.

Tun hnai a Lawngtlai District Level Committee on Myanmar and Bangladesh Refugees thutkhawmna-ah hei hi tarlan a ni a. Lawngtlai district bawrhsap pisa-in an chhinchhiah danin, tun dinhmunah Lawngtlai District chhungah Myanmar atanga raltlan lo lut mi 5,922 (mipa puitling 1,860, hmeichhe puitling 2,049 leh kum 18 hnuai lam 2,013) awm mekin, relief camp 38-ah leh khaw hrang hrang 55-ah an awm darh a. Myanmar atanga raltlan lo lut chhinchhiah hnukung ber chu April ni 25, 2024-a Hruitezawla lo lut niin Committee thutkhawmna-ah hian sawi a ni. Bangladesh atanga raltlan mi 1,872 (mipa puitling 580; hmeichhe puitling 499 leh kum 18 hnuai lam 793) awm ve thungin, relief camp 12-ah leh khaw hrang hrang 11-ah an awm darh a. Bangladesh atanga raltlan lo lut chhinchhiah hnukung ber chu June ni 3, 2024 kha niin, hemi tum hian Chamdur P-I-ah mi 28 (chhungkaw 11) an lo lut a ni.

Tuna Lawngtlai District-a raltlan awm mekte hi kum 2021 atang khan lo lut tanin, a khat tawka lo luh belh zelin, tun hnai lawk May leh June thla chhovah pawh khan Bangladesh atangin mi 191 an lo luh belh leh a. Sawrkar lam leh tlawngai pawl hrang hrang atanga tanpuina lut hmangin raltlante chhawmdawl na hi kalpui thin a ni. Bangladesh atanga raltlan rawn lutte hi Bawm hnam an ni ber a, Lawngtlai district-ah chauh an awm a ni.

Health department chuan raltlante tan a thlawna inentirna (free clinic) buatsaih, a thlawna damdawi sem, hri danna pek leh thosilen sem te an lo kalpui tawh a. Tun hnaiah Chamdur 'P' leh Vaṭhuampuiah te free clinic buatsaih leh turin ruahmanna kalpui mek a ni bawk a. Raltlan lo lut vanga natna inkai chhawn theih a darh loh nana raltlante thlithlai leh a ṭul anga an dinhmun endik turin health department aṭangin hma lak chhonzawm dan ngaihtuah ni se, tih a ni a. DCSO office chuan fur laia tla tur buhfai chhek khawl hna an kalpui mek rualin, raltlante tana buhfai pek tur kep thei tura hma lak dan ngaihtuah ni se, tih a ni a. Sawrkar bakah CYLA leh pawl dang aṭanga raltlante chhawmdawlina leh ṭanpuina pek ṭhin chungchang te pawh sawi ho a ni bawk.

<><><>

ALL SET FOR SWEARING IN CEREMONY

Sorkar laipuia Narendra Modi-a kaihhruai NDA sorkar thar chu zanin dar 7:15-ah, Rashtrapati Bhavan-ah neih a ni dawn a, President Droupadi Murmu-in Pu Modi-a leh Council of Minister turte, rinawmna thu tiam tirin a la lut dawn a ni.

Puan tawh angin, Pu Modi-a hian Zirtawpni khan President hmu-in, sorkar thar a siam theih thu a hrilh a, BJP President JP Nadda hovin NDA MP-te pawhin President hi hmu-in NDA Parliamentary Party leader atan Narendra Modi-a an thlan thu, ziakin an thehlut a ni.

Akashvani Corr sawi danin, sorkar thar lak luh inkhawmah thenawm ram hrang hrang hruaitute an tel dawn a, Sri Lanka President, Ranil Wickremesinghe, Maldives President, Dr. Mohammed Muizzu leh Seychelles Vice President, Ahmed Afif-a te bakah Bangladesh, Nepal, Bhutan leh Mauritius Prime Minister-te pawh an tel dawn a ni.

Akashvani Delhi chuan sorkar thar lakluh inkhawm chanchin hi dar 6:45 atang hian FM Gold, Indraprastha leh Akashvani Live News 24x7 channel-ah te a puang chhuak dawn a, Akashvani Aizawl leh Akashvani station dang zawng zawngah pawh pek chhuah a ni ang.

<><><>

SIKKIM SWEARING IN

Prem Singh Tamang-a kaihhruai, Sikkim sorkar thar chu naktuk hian lak luh a ni dawn a, lak luh inkhawm hi tlai dar 4-ah Gangtok-a Paljor Stadium-ah neih a ni ang a, sorkar thar lak luh anih dawn avang hian Gangtok Municipal Corporation huamchhunga zirna in leh sorkar pisa-te khar vek a ni ang.

Tun assembly inthlanah khan Pu Tamang-a kaihhruai, Sikkim Krantikari Morcha (SKM) chuan seat 32-ah seat 31 huiin hneh takin an tling a, Sikkim Democratic Front-in seat 1 la-in an President, Chief Minister hlui, Pawan Chamling-a chu a dinna bial hnihah a tling zo lo ve ve a ni.

<><><>